

欽  
定  
全  
唐  
文

欽定全唐文卷九百九十六目錄

闕名 三十七

萬仁泰墓銘

大唐故雁門郡解府君墓誌銘

大唐扶風馬氏墓誌

大唐故員府君夫人墓誌銘

劉夫人辛氏墓誌銘

唐故馮府君墓誌銘

故天水姜夫人墓誌銘

唐貝州永濟縣故馬公郝氏二夫人墓誌銘

唐處士包公夫人墓誌銘

唐故尹府君夫人朱氏墓誌銘

汝南周君墓誌銘

唐陸君夫人孫氏墓誌銘

大唐魏博節度別奏劉公故太原郭氏夫人墓誌銘

萬氏夫人墓誌

唐故陸氏劉夫人墓誌銘

闕二 大夫行太子左庶子分司東都上柱國范陽  
字

盧府君墓誌銘

大唐康公夫人墓誌銘

唐故朝散郎貝州宗城縣令顧府君墓誌銘

故來府君及夫人常氏次夫人郭氏墓誌銘

唐故瑯琊王氏夫人墓誌

唐故上谷成公墓誌銘

欽定全唐文卷九百九十六

闕名 三十七

萬仁泰墓銘

君諱仁泰字國寧祖翽父清清之次子也君不仕性玩琴書情兼義友以元和二年二月疾終春秋五十有四窆於硤石市東一里新塋禮也娶彭城劉氏生子四銘曰

元宮冥冥兮曉不開魂魄蕭蕭兮啼方哀愁雲靄靄兮雨添淚松栢颼颼兮風鳴籟

大唐故雁門郡解府君墓誌銘

府君諱進字進族茂雁門派別條分今籍於京兆府鄠縣  
八步鄉解村人也祖諱齊父樂道不仕府君即樂道之第  
二子也修短不意去元和四年三月四日疾終於河南府  
河陽縣太平鄉樹樓村之私第春秋六十有五即以元和  
五年十一月十一日權厝於私第北二里之原禮也孀妻  
李氏偕老願違哀號痛切嗣子忠信次子少遷次子少恭  
次子少璘次子少儀次阿小長新婦曹氏等號天叩地柴  
毀過禮殆不勝喪窀穸云具禮物咸備恐墳隴有變故刻  
頌立名以作永年之記

茫茫蒿里寂寂松扉痛君子之長逝歿寒泉而不歸

大唐扶風馬氏墓誌

廿三娘馬氏名姹扶風人也故侍中太原尹子曾王父故  
太子諭德兼兵部郎中子之王父故鄂州州從事子之先  
父也子生於珥貂之家育在紉綺之室笄年廿歲灼如薤  
英期偶適耀闕我後嗣何華而不實祉福不臨以元和八  
年七月三日洪水忽來浸溢夏汭合郭爲患顧比闕遂假  
官航以虞闕

大唐故員府君夫人墓誌銘

關  
昔因周文王之後分郡於南陽祖諱憲格高調逸學富  
才雄退卧雲林高道不事父諱麟文詞間世儒素成家器  
宇深沉風神朗悟一心孤高寒峰映月爲量不測發言有  
徵心常懷分義尤濟貧遠邇之人咸懷其德何修短之有  
命以元和十一年五月十八日啟手足而告終春秋卅有  
六夫人房氏雍容令儀肅穆懿範畢舅姑之大禮享年卅  
有二同年八月十六日續夫而歿兄昌忝同支氣痛苦蓮  
心嗣子元啟攀號擗踊仰告皇天罄家有無備終大禮以  
元和十一年十二月廿九日合祔大塋而安墳壠山谷變



改託於銘記其德詞曰

窮燈暗暗泉室冥冥孤墳對月荒野熒熒千秋萬歲永隔  
恩情

劉夫人辛氏墓誌銘

唐故平盧軍節度押衙兼左廂兵馬使銀青光祿大夫雲  
麾將軍檢校國子祭酒兼御史中丞上柱國食邑二千五  
百戶劉公夫人隴西郡人也父諱行儉夫人即府君長女  
也聘於彭城劉公公不幸早薨夫人稟山嶽之粹靈受人  
倫之大福博行而多聞發言而合禮素德全備淑慎威儀

迨於姻親俯仰咸若挺霜操而馳其聲彙女功而發其譽  
夫人六十有六以太和九年秋七月廿日而薨夫人有子  
二人長子平盧節度衙前虞候雲麾將軍試殿中監上柱  
國克勤次子節度散字闕一將克恭生女一人日引子等哀  
毀過禮杖而不起乃扶護靈柩當年冬十月七日祔葬於  
青州益都縣永固鄉廣固之里以先塋不利故別遷宅兆  
西據于闕一字倚山印之崇秀東極于荒南眺青山北臨于  
郡仍書銘于墓內銘曰

白玉無瑕青松有節德儀咸備行階先列闕一字弃闕一字世而歸

天流芳華而不歇蒼茫野色雲悲鴻咽林

闕二字

分悲風光

娟娟今夜月

唐故馮府君墓誌銘

府君諱倫字環周長樂人也曾祖思祖父璋俱養性邱園高尚不仕府君即璋第二子幼而簡約長而宏雅恬然自處不趨世利禮則凝重器宇沈深雖榮之與辱不能動其色忘言得意忻忻如也輕財重義博識多能理性內融徽猷外發男公造立身恭謹色養兢兢二女令淑有聞各娉他室嗚呼斯人不保遐壽少乖攝衛伏枕彌旬藥術無

徵奄隨風燭以太和十年八月一日終於私第享年七十  
府君殄也陰雲暗慘鳥雀悲鳴至理元微天何可問男女  
迷謬叩地號天閭巷傷聞爲之慙然夫人陳氏蓬首灰心  
沈哀骨立徒想瓊田之草無復返魂之香以其年十月十  
五日葬於江夏長樂鄉射亭里之原禮也北背黃鶴之嶺  
南瞻八缺之峯恐年代侵疎川原變易剋石記事永將不  
易辭曰

日月至明尚有盈缺邱山至壯尚有崩裂感彼馮君隨波  
生滅時惟孟冬析析悲風凝陰蔽野苦霧霾空敬勒斯志

千載無窮

故天水姜夫人墓誌銘

大唐故駙馬都尉天水姜慶初女適故殿中侍御史劉元質享年七十三於開成三年十月一日終於鄂州私第以其年十二月二十一日權厝黃鶴山南原禮也懼陵谷之多變故爲斯銘用紀悠久之祀

唐貝州永濟縣故馬公郝氏二夫人墓誌銘

君諱恒父諱超其先扶風郡人也昔馬融注解累代欽崇風後允因官徙居甘陵郡乃祖乃父遂爲永濟縣人焉公

以禮爲度以德爲車衣著篇章飲食經籍謝家鮑氏羞當  
章句之流恥也文學之列金石爲節松竹表貞亂代逃名  
庸君隱跡懷寶不仕韞道迷邦於是道德互門仁者爲里  
嗚呼天不憖遺神莫見祐元和七年七月廿一日寢疾終  
於沙邱方私第也享年卅十時也日月無光雲天慘色閭  
巷過密行路傷嗟權殯縣西一里先夫人松蘿靡託葛藟  
無依結誓指於柏舟空淚流於斑竹以開成六年正月十  
三日與二夫人遷葬於故塋禮也仲子關二盡關一以竭  
家資因爲遷祔恐關一改易刻關一爲紀

平生志貞松筠表節堅勁金石潔白冰雪

闕一字

遍乾坤光

連子孫輝赫三代榮慶一門道

闕二字

字名彰四海天何奄

禍於幽魂骨肉永閉於長夜何時再覩明昏

唐處士包公夫人墓誌銘

夫人姓張其先清河人也皇父諱鄰夫人生有妍姿長修  
言行包君前取義陽朱夫人而生四子不幸朱夫人中年  
下世及終喪親迎娉夫人爲繼室敬愛均乎長幼周旋廣  
備親疎撫育前男恩過已子嗚呼夫人行年六十有六以  
會昌三年十月九日奄終錢唐縣方興鄉之私第包君以

再傷齊體追悼何心盡禮居喪卜時將葬前男女哀慕無容以其年癸亥十二月十一日丙申葬於履泰鄉之高原禮也恐陵谷以變更託斯文之可銘曰

噫夫人兮倏忽流年

闕三字

兮冥冥荒原慘慘靈谷悠悠夜

泉未

闕三字

歸於此焉

唐故尹府君夫人朱氏墓誌銘

曾

闕一字

祖從家狀官告墜失不敘府君諱澄其先望在天

水貫居秦州後子孫分散各處一方今權居孟州即爲河陽縣人也公爲人端耿量雅恬和與人結交千金不易一



言道合駟馬不追遠近欽風花城共美奈何積善無慶天  
降其禍去開成四年告終於私第春秋六十有七夫人朱  
氏卽世廣陵郡人也笄年秦晉匹配歸於尹氏之門婦道  
禮儀不虧晨夕之孝接事舅姑能善能柔和睦六親鄉閭  
傳禮奈何大運將至卧疾連綿千方無效萬藥無徵啟託  
聖賢其疾不愈闕一字會昌四年十月十九日終於私室春  
秋六十有三男女七人長子元慶新婦王氏次子元禮新  
婦戴氏次子元簡新婦賈氏次子元雅新婦王氏小子元  
殷未婚長女十四娘夫張氏十五娘歸開氏嗣子等非法

不行非禮不動

闕二

焉有丈夫之志兒女等叫天泣血五

內分崩稱家有無將

闕一

葬事卜得會昌四年十一月十

八日葬於孟州河陽縣安樂鄉

闕二

村禮也恐年代

闕一

遠陵谷有遷刊石爲文乃申銘曰

嗟乎尹君生爲哲人言無過失花城共聞千金交結恩義

長存招賢納士禮法芳新嗟乎尹君沒爲異人嗣子擇兆

安葬神魂千秋萬載

闕二

子孫

### 汝南周君墓誌銘

君諱文遠字道從祖諱岳先父諱通君即通之長子也幼

讀儒書長而習禮弱冠之歲咸譽所知內孝親姻外穆僚  
友不能苦濫於琴酒乃綰職於監司三五年間榮譽可獎  
何期末申公表奄卒壯年嗚呼霜劍摧鋒鳴琴絕軫春秋  
卅有五大中二年三月十五日終於天長之私館也以其  
年十月二十九日祔於先祖妣王夫人列域以爲窀穸禮  
也娶宏農楊氏恭孝內諧舉案從禮一子三歲名曰小君  
令弟二人曰文遇文造悼鵠原而遽絕誰濟急難桐荆榦  
摧雁行何續敢忘兄友銘誌弟恭固請長詞用彰後紀者  
焉銘曰

嗚呼周君世命奚促三十五歲禍來衝福手劍摧鋒身紳  
弃玉欲濟舟傾風前失燭一旦歸冥百齡何續千歲之中  
再生王國

唐陸君夫人孫氏墓誌銘

夫人吳大皇帝十九代孫德之女也令淑有聞名傳四德  
笄年歸於陸氏君名瑛有子三二男一女長男宏說次曰  
宏諮並未有所娶女則初笄之歲未有所歸夫人以大中  
四年遇疾百藥無徵千靈靡究即是歲仲夏月三日而終  
春秋五十有七男女號踊泣血摧咽親戚悲噫日月逾邁

龜筮叶從於其年季秋月末旬八日而安厝富陽縣西廿里上黃山墓然而禮墓則南登極峭北達長衢東西即富春孫氏之山矣慮年月將寢故列塋記其誌銘曰

穆穆夫人名傳四德染疾不愈歿歸泉路蒼茫山谷冥冥九泉恐年月寢誌銘列塋

大唐魏博節度別奏劉公故太原郭氏夫人墓誌

銘

夫人太原盛族遠祖因官遷居於大名今爲魏郡人也三代祖並轅門上將名冠古今勲業俱高不可具載父君佐

使宅親事兵馬使押衙以弓裘飾身文武不墜守忠事上  
信義居懷可謂丈夫矣夫人即押衙之長女也以初笄而  
歸於劉公在家而令淑有聞出嫁而四德克備吁上天難  
問

闕一  
字

短不容不幸以大中六年五月十二日終於府元

城縣慕化坊之私宅也享年廿五矣嗚呼父母腸斷良人  
痛心生死路殊龜筮叶吉以其年閏七月九日遷柩於府  
西南五里貴鄉縣王趙村祔先塋禮也慮邱壟之更變故  
刊貞石爲銘其詞曰

婉婉柔儀言容和茂婦德可觀進退可度上天不均掩同

薤露大魏西南良玉瘞土萬古千秋永扃幽戶

萬氏夫人墓誌

有唐大中六年龍集壬申十二月十三日豫章郡萬夫人  
終於揚州江都來鳳之里年卅九爰自笄年歸於閻氏之  
室育三男一女長子公慶次曰公閔幼曰公閻卜其宅兆  
即以當月廿四日窆於揚子縣界江濱鄉白社村其地東  
西十丈南北十五丈刻字於墓庶乎後迷萬古千秋永爲  
後記

唐故陸氏劉夫人墓誌銘

夫人彭城郡人也父峯皆詞林學趨官迹立筭年禮聘適於陸門盟輓雞鳴嚴勤婦節大期俄屆嗚呼於大中九年七月闕日寢疾終於華亭邑內之私室也芳年四十有七以其年十一月一日葬於縣東三里買宋氏地之新塋禮也有子三人長度次夫師闕師雖以幼童哀訴過禮恐代異時移故刊貞石銘曰

夫人劉氏簪纓之女節婦義夫早聞令譽隙光西邁逝水東流佳城一閉萬古千秋

闕二  
字

大夫行太子左庶子分司東都上柱國范陽



盧府君墓誌銘

字闕六范陽闕一郡人也其先齊太公之一闕十至闕六十四

代闕六後四世至闕一為闕七自闕十氏闕四皇朝尚書

刑部員外郎諱莊道闕十甲闕一山闕四公之伯仲頡頏

一闕三十祖諱炅宣州宣城縣令轉太子左庶子闕二大夫

字闕五事闕十尚書先夫人闕二徐氏追闕九王父諱闕三十八

字進士闕十太子正字秩滿攝度支巡官是歲京師大旱

一闕十東闕十郎秦公充考試官以闕二十其人先是他邑

有殺人亡命者闕九因拘累闕三自闕七有日矣府尹以

欽定全唐文

卷九百九十六

關名

士

公清白

字關一

事命往

字關二

公悉

字關三

公求證驗深

字關三

果

字關八

即于公之陰德無過也由是遷

字關四

大

字關二

公

字關二

制

字關七

改監察御史裏行府

字關一

知鹽鐵揚州院事轉殿

中侍御史

字關二

京兆府功曹掾典貢籍於神州第名為轉

春官

字關一

時為得人故相國崔公諱鄆以

字關四

辟為觀察

判官

字關二

侍御史內供奉

字關四

累

字關二

府惕勵當官從容

字關一

贊

字關十

朝

字關十

憲府風望尤

字關二

按大獄摘發奸

字關九

字判刺史

字關五

者

字關四

深刻訊公

字關一

奏之公曰

字關一

閒

周理之戈

字關八

道延光之

字關十

及害功也

字關七

屈

字關三

多

闕三刑闕五萬年縣令闕七之地闕二得中闕四抑豪闕六

字授京兆少尹武宗闕十公闕三道闕三使公為副焉闕三

字陵下闕四從闕四而闕十司業分教東闕六任太常闕三

字務凡闕六七十有三其轉原闕一用公闕三不為闕十

家闕七位意以闕四殆七八年豈闕三嗚呼以大中九年

七月十五日歸全於闕四里之私第其明年歲在丙子四

月十三日闕七氏縣之闕十先府君之闕二也夫人清河

郡君崔氏闕九度已闕九之士闕二人闕三河南福昌縣

丞闕三十訓當必光其門公闕四公闕二之闕二過於闕三

闕名

字之關十俾關三退不得關十

郁郁盧氏關六重關五門傳祖訓家關四生關三濟其關一

字芳關三承關七薦能拔義關八蔚矣關五仕關二人關一

字奄忽關二夙昔關一徽關八及葬山關七雲愁九泉之

上兮樹老松楸千載可存兮關四

大唐康公夫人墓誌銘

公諱叔卿其先衛人也夫人清河傅氏其先清河人也公幼而有禮長而謙和修身慎行與物無爭何圖天授之仁而不與之壽何不幸與以寶歷二年三月十四日因寢疾

終於家享年卅有五其年遂遷窆於淄川縣萬年之西北  
三里孝水之西原從吉兆也夫人令淑容範宋子河鯉六  
禮貞吉享年六十有八以大中元年六月一日遘疾彌留  
遂終焉權殯於堂以大中十年十一月二十五日遂遷祔  
於塋兆有子一人早亡有女三人長適屈氏次適張氏而  
承其家焉幼適王氏皆撫擗號訴哀毀過情遂召良工刻  
石染翰乃爲銘曰

寬宏德禮謙和淑人改過不愆慎行修身其夫人賢懷孝  
敬邕睦和柔四鄰欽承九族其盛德風猷名芳不朽貞石

誌之天長地久

其三

唐故朝散郎貝州宗城縣令顧府君墓誌銘

公諱謙字自修其先吳郡人季歷丞相肅公之後也漢魏以降蔚爲茂族史譜詳載此得畧而述焉大王父諱希揚登州軍民事衙推官王父諱彭堯州司戶參軍先府君諱行大宣州寧國縣丞先太夫人吳郡陸氏公即先府君冢子也公體質魁梧風神朗秀溫其珪璧凜若松筠粵在統綺性質端敏卷書進退逾於老成早歲舉明經三禮二科洞達微言貫穿精義獨行不合時流所排晚節以談笑曳

裾歷諸侯上客魏帥何公一見若平生交表公高才請宰

劇郡由是褐衣拜貝州宗城縣令公以戎虜之地民俗驕

復非鳴琴可齊

闕一字

展驥乃乖理張翰之扁舟企陶公之

高躅淞有勝地雲間故鄉豹隱鴻冥韜光晦迹其有巖廊

彥士

闕一字

島逸人每披霧見天開雲覩雉莫不高山仰止

如不及焉噫人皆知麟鳳之爲瑞而不知善人爲瑞也不

使公執正當路於時元龜不泯於將來盛德必鍾於後嗣

造物者大誤彼蒼生之不幸乎嗚呼夢感兩楹

闕一字

一生二

暨以咸通十三年歲次壬辰六月二十有八日丁卯啟手

足於蘇州華亭縣北平鄉松子里之私第享年六十有七

先是公於第之南隅列植松楸有公叔

闕一

之想焉明年

歲在癸巳十一月二十四日乙卯灼龜析著始遂先

闕一

寔於茲原禮也夫人宏農楊氏貞順婉約閨門楷儀

闕一

爽撫孤罔不適禮男六人長曰襄杭州鹽官縣尉次曰臺

常州晉陵縣尉次曰占旁州館驛巡官試左武衛兵曹參

軍次曰實鄉貢明經次曰滔次曰潛皆在嬰幼惟實與滔

公之允戚能接物孝悌治身動惟直方靜必溫克奉詩禮

之明訓在邦家而有

闕一

是使聯榮清途列於霄漢有後



右廂都虞候判官皆行賓及子壻行實感激嚴訓竭力祇承佐夫人同辦遷厝以當年十一月廿九日葬於青州益都縣望沂鄉之原也旒幡前去孤雲爲之悽慘輜車後來流水豈任嗚咽慮江河他去巖谷遷移聊錄行藏以銘貞石銘曰

天際高標藏諸道德素月懸徽白雲爲則卓雅有稱規章無忒惟信惟義心期本志自悅自娛誰達茲事青松白楊今乃荆棘之固殊千秋萬歲今因積善之能置

欽定全唐文卷九百九十七目錄

闕名

三十八

唐易州上谷郡故安定梁府君墓誌銘

唐故陳府君墓誌銘

鄆府君墓誌銘

大唐濟度寺大比丘尼墓誌銘

威神寺故思道禪師墓誌銘

唐故張禪師墓誌銘

唐故鳳光寺俊禪和上墓銘

慈潤寺故大靈琛禪師煨身塔銘

闕六 夫人程氏塔銘

嵩山闕三 故大德淨藏禪師身塔銘

宣化寺故比丘尼堅行禪師塔銘

唐崇業寺故大德禪師尼真空塔銘

趙州真際禪師行狀

欽定全唐文卷九百九十七

關名 三十八

唐易州上谷郡故安定梁府君墓誌銘

關一  
字

夫昏默未形爰依大道龍龜啟象始敘吉凶漸著君

親乃陳孝悌生以溫清色養歿以封樹烝嘗人子送終其

來遠矣梁氏門風祖允此不備書蓋以星朔旣淹子孫繁

嗣因官得第而居此焉曾祖諱希幹不仕素爲文業曾若

詩書厭官辭榮隱居畢世皇祖諱甫平亦不仕慎守公方

尅勤儉素外符忠正內切孝慈在邦而於人有和居室而

與物無競年鄰耳順而終壽焉皇考諱重立字顯英性惟  
貞謹言慎樞機溫鑒而良彥取裁博達而英髦受旨羽儀  
朝市紀綱人倫可謂名似玉而長溫行如松而不朽年逾

知命石火忽臨以天祐七年正月十二日

闕一於永樂坊

之私第而告終矣夫人武功蘇氏郡中之良族也笄總之

闕一

禮赴移天耳順之秋風燭長別痛

闕一

履冰傷彼斷

紼府君有嗣子三人孟曰思景高陽軍押衙充孔目官仲

曰思恩季曰思度押衙昆仲幼懷聰敏長有博聞蘊季子

之詞華抱安仁之才器笙簧密職丹藻列班孝盡旨甘讓

敦乎足抑衡與弟昊天罔極何日忘之荼蓼纏心鋒針刻  
骨晨昏難及喪薦竭修抑衡昆仲以乾坤吉就龜筮叶和  
以天祐十年癸酉歲孟冬月己巳朔二十三日辛卯於易  
州東北隅一里半易縣玉山鄉梁村之右本塋之禮葬也  
其勢乃前臨易郭後倚燕山左近昭王之祠右接荆卿之  
廟東西遐迴形勝可觀良恐海變飛塵山成朽燼垂之記  
祀傳以後昆者歟銘曰

乾剛坤柔有勞有休人倫終始難逃去留嗣子而昊天不  
報甘養而叩地無由府君今金玉君子逝水兮萬古千秋

唐故陳府君墓誌銘

府君諱環，潁川人也。祖興，父道清，並不求宦達。君即清公

之第二子也。幼著才識，長閑規矩，克言理行。闕有三以當

年八月十八日寔於闕二十八里齊景鄉推山南二里祖

墳。闕三塋禮也。君娶吳郡顧氏，有子三人，長曰遂。闕一次

曰師損，三曰公甫，並至謙至讓，忠乎孝乎，泣血主喪，絕漿

逾。闕二恐月日久邁，陵谷遷移，刊石爲誌，永傳不朽。銘曰：

山作田，今田作海。萬古存兮，誰不改青松。新隴曉無年，千

載惟留銘記在。

鄔府君墓誌銘

府君唐故侍御史某之次孫性好古不撓於時夫人願生  
三子超庭頗聞詩禮長子頌遠爲運漕之使北自維揚旋  
於海昌謂其弟曰宗墓衆廣塋壠比櫛其間安厝豈汝等  
願耶遂卜他地得海昌里之一墟焉南去古墟三十步禮  
也銘曰

海昌之里馬牧之墟孤墳歸如歸生之餘送終伊何家有  
孝子卜兆伊何青鳥是指千歲萬里百年遄已

大唐濟度寺大比邱尼墓誌銘



法師諱法願俗姓蕭氏蘭陵蘭陵人梁武帝之六葉孫唐  
故司空宋國公之第三女也厥夫微子去殷昭茂勲於抱  
樂文終起沛兆峻伐於收圖瓊構鬱而臨雲珠源祿而浴  
日延禎錫祚開鳳歷於朱右疊慶聯規纂龍符於紫蓋逮  
鼎遷南服胄徙東周英靈冠上國之先軒冕宅中州之半  
法師乘因夔劫植本遐生孕月仙姿稟清規於帝渚儀星  
寶態降淑範於台門襁褓之辰先標婉質髫鬣之歲遠挺  
柔情聰悟發於生知孝友基乎天縱中外姻族莫不異焉  
加以骨象無儔韶妍獨立鉛華不御彩絢春桃玉顏含澤

光韜朝薨年將十載頗自矜莊整飾持容端懷檢操每留  
神於鞞帙特紆情於絳組瓊環金翠之珍茵簟衾幃之飾  
必殫華妙取翫閨闈麗而不奢盈而不溢旣而疏襟學府  
繹慮詞條一覽而隅隅咸該再覲而英華畢舉豪飛八體  
究軒史之奇文法兼二妙符衛姬之逸迹羣藝式甄女儀  
逾邵宋公特深撫異將求嘉匹載佇孫龍以先宋鯉而嚴  
庭垂訓早沐慈波鼎室承規幼明真諦飄花見雪初陪太  
傅之觀摘葉爲香遠警息慈之念爰發宏誓思證菩提懼  
塵情於六禮乃翹誠於十誦承間薦謁請離俗緣宋公論

道槐端丹青神化虔襟柰苑棟梁正法重違雅志許以出家甫及笄年爰披法服乃於濟度伽藍別營禪次庭標雁塔遠茂娥臺藏寫龍宮遙嗤魯館於是沿空寂念襲慧薰心悅彼真衣俄捐綺縠甘茲蔬膳遽斥膾腥戒行與松柏齊貞慧解共冰泉等澈超焉拔類恬然晏坐若乃弟兄辦供親屬設齋九乳流音六銖含馥瓶錫咸萃冠蓋畢臻唯是瞻仰屏帷遙申禮謁自非至戚罕有覩其形儀者焉加以討尋經論探窮閭域覈妬路之微言括毗尼之邃旨至於法華般若攝論維摩晨夕披誦兼之講說持戒弟子近

數十人莫不仰味真乘競趨丹枕傍窺淨室爭詣元扉肅肅焉濟濟焉七衆之仰曇彌何以尚也重以深明九次閱想禪枝洞曉三空澄襟定水厭此纏蓋忽現身疾大漸之晨謂諸親屬曰是身無我取譬水萍是身有累同夫風葉生死循環實均晝夜然則淨名申誠本乎速朽能仁垂則期於早化金棺乃示滅之機玉匣豈栖神之宅誠宜捐軀摯鳥委形噬獸斂衿正念奄然無言粵以龍朔三年八月廿六日捨壽於濟度寺之別院春秋六十三姉弟永懷沉痛不忍依承遺約乃以其年十月十七日營窆於少陵原

之側儉以從事律也法師夙盥禪池資慶源而毓彩初依  
道樹託華宗而降靈蘊地義於閑和苞天情於婉孌覩一  
善則怡然自悅聞一惡則怒爾疚懷激仁義於談端明色  
空於慮表故能辭台閭託禪門捨七珍祛八膳精苦之行  
標映緇徒戒律之儀錙銖法侶佇津梁於苦海奄滅度於  
仁祠棣萼分華悲素秋之改色荆株析榦望青枝而增感  
所懼塵飛海帶將迷渭淡之塋石盡仙衣不辨檀溪之隧  
重宣此義乃爲頌曰

闕一  
有殊稱法無異源爭驅意馬俱制心猿志擾情紊神

凝理存展如淑範獨趣元門琬彩

闕一

分瑤姿月舉含芳

槐路疏貞桂序雲吐荆臺霞霏洛渚學兼班媛詞彬蔡女

莫禽匪志

闕二

昭仁捐華台室沐道元津法關開捷心衢

屏塵九流遺累八定栖眞忍藥分滋戒香含烈傳燈不倦  
寫瓶無竭奄愴神遷空悲眼滅式鐫柔範終天靡絕

威神寺故思道禪師墓誌銘

和上俗姓師諱思道絳州夏縣平原人也天縱其志七歲  
出家人推其聰十八剃髮事人不事爲人不爲同鵲巢於  
頂之年護浮囊無缺之日次就有德轉相師師禪行法門

戒律經論耳目聞見紀之心宵緇錫來求簪裾欽仰聽習  
者鶴林若市頂謁者鹿苑如雲去至德二載春秋八十有  
一僧夏六十一時催二鼠妖纏十夢其年十二月示身有  
疾隨爲衆生其月二日禪河流竭坐般涅槃驚慟知聞悲  
覃飛走孫威神寺主僧承嗣五內摧裂擗踴攀號聲竭潛  
哀淚盡續血至乾元元年十二月二日遷於條山之側冑  
子塏頭禮也詢問其地取人不爭砥柱東橫汾河西澍青  
臺鎮北鹽池臨南萃爾塏頭卜擇安葬雖則天長地久而  
恐代異時移陵谷改遷斯文不謬其詞曰

緇門積疊寶樹崩摧法消蓮坐魂滋夜臺條山陰麓歸然  
追頭碧巖引吹清澗繞流和上登兮舊賞功匠興兮今修  
建崇塔兮數仞瘞金骨兮千秋

唐故張禪師墓誌銘

香山禪師諱義琬字思靖俗姓董氏河南陽翟人紹嵩岳  
曾善大安禪師智印法歲廿七世齡五十九開元十九年  
七月十九日長天色慘塞樹凝霜頂白方面赤方右肱枕  
席左臂垂膝言次寂默奄魂而歸舉體香軟容華轉鮮感  
瑞嘉祥具載碑錄師未泥洹先則元記吾滅度卅年內有



大功臣置寺度遺法居士爲僧卅五年後焚身留吾菓園  
待其時也果廿八年有文武朝綱闕一國老忠義司徒尚

字

書左僕射朔方大使相國郭公上額於居士拜首受僧奏  
塔梵宮榜乾元寺法孫明演授禪文託葬祖黃金迷德於  
中書令汾陽郡王郭公徹天請號焚葬借威儀所由檢校  
大厯三年二月汾陽表曰義琬禪行素高爲智海舟航是  
釋門龍象心超覺路遠近歸依身歿道存實資襲異伏望  
允其所請光彼法流其月十八日敕義琬宜賜諡號大演  
禪師餘依擇吉辰八月十九日茶毗入塔今卅載無記不

從大禪翁也行慈悲海得玉髻珠施惠若春研芳吐翠破  
邪寶劍見網皆除業爲學山萬法包納練行凝寂方能動  
天塔磨青霄砌下雲起星龕月戶面河背山清淨神靈庶  
幾銘曰

行破羣邪業爲學海戒月青空心珠自在塔面長伊鈴搖  
岳風動天威力無住無空

唐故鳳光寺俊禪和上墓銘

和上諱常俊俗姓張氏清河人也皇祖莊皇考李即李之  
第二子也卅歲出家年齡七十僧夏卅卷自會昌元年五

月十五日示疾歿即以其月廿六日遷柩於常州無錫縣

太平鄉闕村東一里官河西八十步張宗祖墓中卜其宅

兆庚首而安厝之禮也有門人文則元通伯昌俗兄秀姪

令容等悲痛哀摧涕淚交結恐陵谷遷改桑田變移塋域

無徵乃刊碑而爲誌銘曰

禪宗內蘊法印心

闕二

棄浮生歸乎寂滅

慈潤寺故大靈琛禪師燬身塔銘

禪師俗姓周道諱靈琛初以弱冠出家即味大品經論後

遇禪師信行更學當

闕一

佛法其性也慈而剛其行也和

而潔但世間福盡大闇時來年七十有五歲在闕二三月

六日於慈潤寺所結跏端儼泯然遷化禪師亡日自足冷

先頂瞞後歇經云有此相者尅闕一生勝處又康存遺囑

依經闕一林血肉施生求無上道闕一合成皂白祇教闕二

字含悲傷失送茲山所肌骨闕二閣維鏤塔冀海竭山灰

芳音永嗣乃為銘曰

逖聽元風高惟遠量闕一學莫捨一乘獨暢始震法雷闕一

字淪道藏示諸滅體闕一茲奇相器敗身中瞞餘頂闕一

結跏不改神域云喪闕一曰既虧羣迷失望非生淨土禪

金史卷之二十一

指何向塔頌一首闕高帶淶水鏤塔寫神儀闕形名留

萬古闕劫盡乃應虧

闕六夫人程氏塔銘

闕六果東郡東阿人魏汝闕五昌齋也若乃道風門慶闕五

字史牒詳之矣夫人貞規闕五融少崇龍女之因長勵闕四

字說生應化雖順軌於六塵闕四竟騰身於百寶以顯慶

四闕三四日終於京第春秋五十有闕三明元年十月五

日遷葬於終闕二祔徵士靈塔安厝遵先志也其闕二噫

將恐二天地一山川敬勒徽闕二昭不朽其詞曰

闕一 阿女訓西鄂婦德貝葉因成蓮花闕一 陟巖巖兮神

挂杳杳兮靈闕將畢闕一 而恒存與終峯而罔極

嵩山闕三 故大德淨藏禪師身塔銘

大師諱藏俗姓儼濟陰郡人也十九出家六歲持誦金剛般若楞伽思益等經寫瓶貫綆諷味精純來至嵩岳遇安大師親承諮問十有餘年大師化後遂往韶郡詣能和上諮元問道言下流涕遂至荆南尋覩大師親承五載能遂印可付法傳燈指而北歸至大雄山玉像蘭若一從栖寓三十餘周名聞四流衆所知識復至嵩南會善西塔安禪

師院覩茲靈跡實可奇耳遂於茲住闕乎聖典乃造寫藏  
經五千餘卷師乃如如生象空空烈跡可粲信忍宗旨密  
傳七祖流通起自中岳師亦心苞萬有慧照五明爲法侶  
津梁作禪門龜鏡於是化流河洛屢積歲辰不憚劬勞成  
崇聖教春秋七十有二夏三十八臘無疾示疾憩息禪堂  
端坐往生歸乎寂滅即以其歲天寶五載歲次丙闕十月  
廿六日午時奄將神謝門人慧雲智祥法俗弟子等莫不  
攀慕教緣香花雨淚哀戀推慟良可悲哉敬重師恩勒銘  
建塔舉高四丈給砌一層念多寶之全身想釋迦之半座

標心孝道以偈而宣

猗歟高僧嵩巖劫增心星聚照智月清昇坐功深遠靈迹

時徵厥惟上德成茲法興

其一

五法三性八萬四千帝京河

洛流化通宣不憚劬勞三五載間造寫三藏頓悟四禪

其二

三摩鉢底定力孤堅悲通法界慈洽人天法身圓淨無言

可詮門人至孝建塔靈山

其三

宣化寺故比丘尼堅行禪師塔銘

禪師諱堅行俗姓魚氏京兆府櫟陽人也惟師貞儀苦節  
精勤厥志捐別修而遵普道欽四行而造真門豈圖晨霜



易晞夕露難久寢疾牀枕藥餌無徵嗚呼哀哉以開元十二年十月廿一日遷化於本院春秋七十有六夏卅矣臨命遺囑令門人等造空施身至開元廿一年親弟大雲僧志叶弟子四禪賢首法空淨意等收骨起塔以申仰答罔極之志閏三月十日

唐崇業寺故大德禪師尼真空塔銘

禪師諱真空俗姓申氏馮翊郡朝邑人也植性明悟天姿

卓越六度

闕二字

稟自齟年

闕一字

戒深仁行諸早歲旣而

闕二字

字

宿善童子出家訪道

闕二字

與波

闕一字

而無異練心

闕

趙州真際禪師行狀

師即南泉門人也俗姓郝氏本曹州郝鄉人也諱從諗鎮  
廡有塔記云師得七百甲子歟值武王微沐避地岨嶮木  
食草衣僧儀不易師初隨本師行脚到南泉本師先入事  
了師方乃入事南泉在方丈內卧次見師來參便問近離  
什麼處師云瑞像院南泉云還見瑞像麼師云瑞像即不  
見即見卧如來南泉乃起問你是有主沙彌無主沙彌師  
對云有主沙彌泉云那箇是你主師云孟春猶寒伏惟和  
尚尊體起居萬福泉乃喚維那云此沙彌別處安排師受

戒後聞受業師在曹州西住護國院乃歸院省覲到後本師令郝氏云君家之子遊方已迴其家親屬忻懌不已祇候來日咸往觀焉師聞之乃云俗塵愛網無有了期已辭出家不願再見乃於是夜結束前邁其後自攜瓶錫遍歷諸方常自謂曰七歲童兒勝我者我即問伊百歲老翁不及我者我即教佗年至八十方住趙州城東觀音院去石橋十里已來住持枯槁志効古人僧堂無前後架旋營齋食繩牀一脚折以燒斷薪用繩繫之每有別制新者師不許也住持四十來年未嘗賫一封書告其檀越因有南方

僧來舉問雪峯古澗寒泉時如何雪峯云瞪目不見底學云飲者如何峯云不從口入師聞之曰不從口入從鼻孔裏入其僧却問師古澗寒泉時如何師云苦學云飲者如何師云死雪峯聞師此語讚云古佛古佛雪峯因此後不答話矣厥後因河北燕王領兵收鎮府旣到界上有觀氣象者奏曰趙州有聖人所居戰必不勝燕趙二王因展筵會俱息交鋒乃問趙之金地上士何人或曰有講華嚴經大師節行孤邈若歲大旱咸命往臺山祈禱大師未迴甘澤如瀉乃曰恐未盡善或云此去一百二十里有趙州觀

音院有禪師年臘高邈道眼明白僉曰此可應兆乎二王  
稅駕觀焉旣屆院內師乃端坐不起燕王遂問曰人王尊  
耶法王尊耶師云若在人王人王中尊若在法王法王中  
尊燕王唯然矣師良久中間問阿那箇是鎮府大王趙王  
應喏弟子師云老僧濫在山河不及趨面須臾左右請師  
爲大王說法師云大王左右多爭交老僧說法乃約令左  
右退師身畔特有沙彌文遠高聲云啟大王不是者箇左  
右大王乃問是甚麼左右對曰大王尊諱多和尚所以不  
敢說法燕王乃云請禪師去諱說法師云故知大王曩劫

眷屬俱是冤家我佛世尊一稱名號罪滅福生大王先祖  
才有人觸著名字便生嗔怒師慈悲非倦說法多時二王  
稽首讚嘆珍敬無盡來日將迴燕王下先鋒使聞師不起  
凌晨入院責師傲兀君侯師聞之乃出迎接先鋒乃問曰  
昨日見二王來不起今日見某甲來因何起接師云待都  
衙得似大王老僧亦不起接先鋒聆師此語再三拜而去  
尋後趙王發使取師供養既屆城門闔城威儀迎之入內  
師才下寶輦王乃設拜請師上殿正位而坐師良久以手  
斫額云堦下立者是何官長左右云是諸院尊宿并大師

大德師云他各是一方化主若在堦下老僧亦起王乃命上殿是日齋筵將罷僧官排定從上至下一人一問一人問佛法師旣望見乃問作什麼云問佛法師云這裏已坐却老僧那裏問什麼法二尊不並化王乃令止其時國后與王俱在左右侍立國后云請禪師爲大王摩頂受記師以手摩大王頂云願大王與老僧齊年是時迎師權在近院駐泊獲時選地建造禪宮師聞之令人謂王曰若動著一莖草老僧却歸趙州其時竇行軍願捨果園一所直一萬五千貫號爲眞際禪院亦云竇家園也師入院後海衆

雲臻是時趙王禮奉燕王從幽州奏到命服鎮府具威儀  
迎接師堅讓不受左右舁箱至師面前云大王爲禪師佛  
法故堅請師著此衣師云老僧爲佛法故所以不著此衣  
左右云且看大王面師云又干俗官什麼事乃躬自取衣  
挂身上禮賀再三師惟知應喏而已師住趙州二年將謝  
世時謂弟子曰吾去世之後焚燒了不用淨淘舍利宗師  
弟子不同浮俗且身是幻舍利何生斯不可也令小師送  
拂子一枝與趙王傳語云此是老僧一生用不盡底師於  
戊子歲十一月十日端坐而終於時竇家園道俗車馬數



萬餘人哀聲振動原野趙王於時盡送終之禮感歎之泣  
無異金棺匿彩於俱尸矣莫不高營雁塔特豎豐碑諡號  
曰真際禪師光祖之塔後唐保大十一年孟夏月旬有三  
日有學者咨問東都東院惠通禪師趙州先人行化厥由  
作禮而退乃授筆錄之其實矣

欽定全唐文卷九百九十八目錄

李輔國

皇帝奉迎上皇請編史冊表

李朝正

重建禪門第一祖菩提達摩大師碑陰文

楊承和

邠國公功德銘

劉重約

再修敬亭府君廟宇記

李順融

成都得寶碑古篆賀表

楊復光

收復京城奏捷露布

宋光葆

上蜀主表

欽定全唐文卷九百九十八

李輔國

輔國本名靜忠以閹奴事高力士後以王鉷薦侍東宮肅宗卽位靈武輔國豫其謀擢家令判元帥府行軍司馬改名護國又改今名進拜少府殿中二監封成國公首謀遷元宗西內以功擢兵部尚書代宗立進司空兼中書令加尚父後帝遣使刺殺之

皇帝奉迎上皇請編史冊表

臣聞古今大寶皇王受命成功創業皆始艱難繇是足高

光武之功漢圖斯永滅澆殄之患夏嗣以興豈比孝以感  
通德以成化光膺聖歷協契天時開闢已來未有如陛下  
者也頃巨猾間豐中夏不康陛下赫然發憤奉命專征曾  
不踰旬兩京剋復掃清宮闕奉迎鑾輿警蹕鳴笳舊儀逾  
盛行軍便幕故事無闕陛下整法駕擁羣臣遠自望賢拜  
迎路次引旌旆而祥風不散拂鑾輿而瑞雪時飄承順天  
顏無違就養君父之禮億兆同歡猶乃不自爲功至崇謙  
德過周文侍膳之典邁漢高獻壽之儀虔奉至尊敬恭受  
命伏惟陛下以孝理天下也如彼以德化天下也又如此

盛德大業其至矣哉臣幸參締構職在禁戎得親盛明無任抃躍伏請編諸史冊以示將來

李朝正

朝正元和朝官昭義軍監軍使守內侍省奚官局令

重建禪門第一祖菩提達摩大師碑陰文

此碑文布傳於天下久矣未詳其所立處頃日得之

闕二字

其文迺知梁武帝深達元旨若非留心此宗則罕測其涯際或者云梁武帝崩後菩提達摩猶行化人間蓋或者自惑耳考諸史籍則梁大同二年歲在乙卯至太清二年歲

在戊辰相去一十四年矣武帝廢於侯景自大同單閼之  
歲至我唐元和闢茂之歲凡三百四十三年矣朝正嘗願  
於熊耳吳坂再立此碑屬以戎事多故遂乖本志今迺就  
二祖可大師塔前建之用表真宗之所由也菩提達摩自  
西域至中國爲禪宗第一祖內傳心印以爲宗謂意出文  
字外外傳袈裟以爲信信表師資其袈裟授可大師可授  
粲粲授信信授忍忍授能達摩遺言云我法至第六代後  
傳我法者命如懸絲故能受付囑後猶隱遁人間事在本  
傳祖師知當來學徒必注意謂法在衣上不知法本無爲

得之者永超三界了斯元旨是達真宗所以誠絕傳衣令  
學人得意者廣通流布化及無窮拯溺俗於沉沙擢迷途  
於苦海者矣曹溪能弟子南嶽惠讓讓弟子龔公山洪州  
道一洪州弟子信州鵝湖山大義大義貞元中內道場供  
奉大德每敷演妙理萬法一如得無所得證無所證開合  
不二是非雙泯夫無像之像像遍十方無言之言言充八  
極可謂真證直得涅槃宗源乎至十九年四月十九日德  
宗皇帝迺度中貴王士則命捨官賜法名惠通充弟子又  
度官生童子惠真充侍者惠通由是親承教旨妙達真宗



自祖師歷六代後名流大德學徒得意者在行天下敷演  
妙理不可殫紀朝正但據所稟本教來處敘之將來幸辦  
由戶不謬矣今恐年代久遠故重刊石紀之

楊承和

承和穆宗時爲內樞密使

邠國公功德銘

天竺有聖人焉名之爲佛三身互相應化無所從來百億  
同名不知其誰之子德包塵界道冠萬靈有感必通酬念  
如響心操慧炬永燭於大千手運慈航泛流於沙劫晦明

不二淨穢兩同正智如如我無所得雖後天地而有質先  
天地而亡形莫不究清濁之未然識方圓之始卒大矣哉  
若非天下之至精孰能如此夫大德小德優劣不同賢人  
聖人取舍各異乃引衆星之表月立萬象以尊天因喻發  
揚憑茲外飾有言子貢賢於仲尼者不知仲尼之聖加於  
子貢有言阿難相同諸佛者不知諸佛非相以攝阿難見  
尺鷁之至微知大鵬之至廣覩秋毫之至短知大椿之至  
長擬於物即尺鷁秋毫擬於人即阿難子貢雖然近如來  
之門戶識夫子之堦墻瑚璉寶瓶異諸凡器金楹玉棟不

是常材故佛之侍從者即迦毗令人拘那貴族皆辦搖金  
刹名振鐵圍驅六賊如衆鳥之避鷹鷂懾四魔若百獸之  
畏豺武而性海無底惠峰穿霄善入一乘橫通三輩被精  
進所縛不捨用心嘗修之於身去住未決或執如或斷如  
是故生已之法隨滅滅已之法隨生常生之所不生常滅  
之所不滅能詮二義其唯覺乎覺不自明方明覺也夫有  
生滅者是覺之用無生滅者是覺之體即如覺逐滅生生  
隨覺滅生滅俱寂其覺亦亡乃指素月於澄溪祛外緣於  
現性解出人表堪爲代師儔諸法王則吾豈敢何者孔子

登東山而小魯登泰山而小天下今亦然也如來觀溺山而小聲聞觀枕山而小菩薩我佛也同彼虛空不染於幻強立真假曾未牢固是故說行而無所說行說而無所行非行非不行非說非不說非法非非法非性非非性本不生無所滅元不覺無所寂於一不一中悟諸未悟者於起不起中導諸未導者大矣哉若非天下之至神又孰能如彼而夜景呈輝化行西土神光啟夢象教東來思玉毫而遠挹鷲峰仰金偈而虔瞻貝葉身已逝矣空傳結集之書性本存焉如聞在代之說且法以辯志言以辯心非法無

以悟其心非言無以成其志即言說文字皆解脫相有是  
經處即見如來今有右街功德使驃騎大將軍行右武衛  
上將軍知內侍省事上柱國邠國公食邑三千戶充右神  
策軍護軍中尉安定梁公曰守謙職是禁營邦家重器居  
繁不亂兼總緇黃讀佛言親釋氏其貞元中公以溫惠爲  
甲冑清慎爲戈矛跡尚彤闥名高紫闥至元和初授銀瑋  
佐密命鼓翼高岫躍鱗洪波飛鳴近天得志江海五年加  
金紫掌樞機渙汗流心散爲膏雨如絲入耳開展成綸捧  
白日以揚光戴青天而翼化處事之極動而可觀至十二

年遇蔡人逆戎事興天討未平干戈在野天心恐師老矣  
而誅剪未就乃命公撫衆觀敵審度遲速乃奉辭伐罪踴  
躍而行走四牡以宣暢鴻休利萬物以車塵相屬參整戎  
事董護諸軍與將帥同其進也一其議也或縱六奇之辯  
即濤生巨浦雲出深谿或察五間之情即趙楷穿楊楚金  
伐木若有神助不謀成心我旗旣張我車亦列均勞逸而  
義夫爭死齊賞罰而奮臂爭驅蓄銳候時果申長策於是  
選精卒張詭道雜旌旃而不嚴部伍差進退而曲敵之心  
疑實爲鋒鏑詐餌武口賊果輕襲利吾大軍遂使晝掩沙

河葛伯之賊夜遯合流宵渡邵陵之寇全平駭若奔雷勢  
同激電似霜霑寒草風卷餘花縱烈火於平蕪走飛泉於  
大壑摧枯易折墜瓦難全滅蔡之功十有其七餘賊保洄  
曲官軍圍郾城我鼓音方厲武旅方雄操利柄而目無全  
牛執其吭如芻豢悅口摩壘問罪登陴不降梯樓滿空矢  
石相接經四十日燿火失繼人無鬪心畏夏日之赫光懼  
春冰之易泮乃降仍邀公匹馬視師撫納疑懼公悅以犯  
難投誠若歸遂令啟關按轡而入醜類或鼓或罷相視失  
色公曰來余與爾言爾本吉人也何不徇國家之急成其

名而託身於武豹之穴求其噬輿尸覆族誰與咎耶皇情  
極念之故令守謙布澤潤心宣化清耳能悅生避禍者當  
聽之曰明明天子清問下人不能勤王爾失遠畧爲寇盜  
所制而臣節難全犯弧矢之威當剿絕之斃圓首方足莫  
匪精靈念其瘡痍實可憫惻然違予戮汝而不赦恭命活  
汝而無害能遷其不祥而爲祥吉莫大也變其不幸而爲  
幸令莫窮也賊將卒等色轉慙禮愈謹公曰皇上聖文紹  
統神武膺期惟德動天無遠不格被堯舜之法服行堯舜  
之法言所以大文教而九有小康小武功而天下大理嘗



欲戟矛楯親稼穡使人居安各得其壽爾一方不能安時  
處順守衛中國而罪罟自結厲階彌崇即不得已而興師  
非樂殺人也況天德好生容長萬物是以曲開洗汙旁設  
自新招示頑夫以明廣大將士等久遭苛暴翻跡令圖亦  
謂朽燼重燃枯條再葉國刑當宥咸賜無辜豁爾憂心以  
承慶賞降人皆投戈卷旆匣刃弛弦觸地血流向闕蹈舞  
於是五千叛卒不戮一人十萬王師皆服其德從此鯨鯢  
失浪烹飪方因惡鳥巢傾折翼於此恩波大澍封賜有差  
乃授公右監門衛將軍飛詔追還密職如故又掌天地之

戶牖捧造化之關鍵勲隨日厚望逐時深公之美也不滅  
直以沽名不愆義以犯物動靜無隱發言有章至十三年  
天睠凝嗟賞重知勞不自伐功不自德遂與戎印授兵符  
司禁旅之右也公積仁成器積器成名卑牧難踰高光可  
仰定止足之分動必師心辨榮辱之機道樞不撓薄嗜慾  
以守一鄙浮華而處中匡護元流酌之不竭伏以元和長  
慶釋教大興雅叶所歸轉得親近謹於大興唐寺華嚴院  
爲國寫古今翻譯大小乘經論戒律合五千三百廿七卷  
公私祿利不入其門凡是難得無所愛惜嘗求善書者令

絕外塵不飲茹浴身至於精剎焚香而就筆硯擇其力多者以多價酬之少者去之人不約而自勸也於是染素流光含丹縱彩雲生墨沼之上花開方絮之中衛索分鑣王羊並驚各行軌轍跡不相讓又立經堂一所三間徘徊安住法輪必資豐敞作制惟永壯我皇都豈得爲工者不極其妙爲材者不極其美殊形異狀生於斤斧之中曲直方圓豈逃繩墨之下於是彩棟霞張雕楹雲布朱扉洞啟縹壁含光羽族棲於綺窗鱗介遊於藻井修羅率下爭提天矯之梁藥叉命徒競戴爰栽之拱衆靈翼衛諸天護持恍

惚莫辨其形來往不留其跡又於堂內造轉輪經藏一所

刻石爲雲鑿地而出方生結構遞

闕二字

緣立無數花幢竊

比兜率造百千樓閣同彼化城狀物類本擬容奪真鷄鵠

若飛而不飛虹螭似走而不走藥櫨櫛比雜之以琳琅棖

栴駢羅飾之以珠翠凌雲五級方開四門璀璨相輝煥麗

交映離婁覘之眩目公輸閱之奇

闕二字

歲古人多有慚色

不知來者孰能繼歟於是方表含輪虛中不滯羣經之府

所好必從遊藝者任其卷舒杖德者恣其探討或超諸垢

穢蓮花隨手而開敷或等彼清涼甘露應心而滴瀝乘之

所妙者不論其小大法之所尚者不

闕一字

其淺深譬諸江

河所汲隨淺從流自得不礙疎數其外或圖寫龍神鬼物

之狀以爲嚴飾或造菩薩天仙之類周匝其旁白壁成容

玉眸高視黃英作相金口如言設無體之禮實不佞於屈

伸獻無聲之樂終不煩於音律五色

闕二字

亂其目八風無

以吹其心守靜樸以自持執堅中而不磷或虔恭默如或

侍坐儼如又於堂北別立鏡燈朱燄揚輝紅光滿室常生

縱巧有符丁緩之奇蘭膏自芳不假海人之贈幸斯破暗

永繼其明於是羣藝畢衆工歸八龍

闕一字

軒四王護閭雨

霑香砌何塵垢之蒙潤風搖寶鐸流美響之不已公頓首  
奏曰臣聞法象莫大乎天地變通莫大乎四時所以萬物  
生中不擇於覆載榮枯美惡必備於寒暑雖古先哲王宏  
天若德豈同聖代則而行之伏惟長慶文武孝德皇帝陛  
下英冠四維氣含八極齊日月之至耀光燭無窮等天地  
之至仁寰瀛受賜坐超湯禹立並義軒驅岳瀆之精靈馳  
道德之車馬有典有則無怠無荒法上元以生成體陰陽  
以御物動合靈契事膺神符永綏兆人克顯休命臣猥承  
委擢如荷邱山蕭艾空竊於春陽螻蟻每慚於雲雨修持

闕二  
字

允奉穹蒼上黷冕旒伏增驚越臣亦知螢光助於兩

曜映澮宗於四溟實不足以添輝亦不足以濟廣然纖美

見容知大明之及遠涓流必納識渤澥之宏深臣早悟多

藏勇於施捨聞斯必舉所作成集誓嚴持

闕一字

猷上續於

恩光啟導法涯永資於德澤帝曰俞卿以檀波羅福保於

朕躬朕以官惟其人任卿勿貳實千載之一會何魚水之

見稱想卿逢時宏道多慶公荷寵之極涕零如雨又奏曰

如來奧旨必藉開張若不言宣何以廣福臣請得無染沙

門貞實等二七人御斯信馬駕彼白牛直出四關掃諸五

翳伴持正念調伏其心爲國傳經乃至無算陛下得佛祕  
印行最上乘於多劫中爲人父母遂令釋子遵有漏法傳  
無盡燈滋寶雨而潤及四海布香雲而蔭乎千界光天之  
下孰不蒙益受益之利上集一人伏願寶曆天齊金輪嶽  
固永居億兆之上克承無疆之休帝悅依奏公曰克樹有  
爲期於不朽畧須題述以告將來遂命戎副右監門衛將  
軍楊承和文而書之辭曰小子蓬茨劣人跡度卑淺無當  
時應用之效有僻陋至愚之累靈波曲潤幸得充乏幾厯  
星歲繆厠下風聞可道之言觀可行之行書紳不暇何以



褒稱至如走光塵俟嘉命愚人不敢拒若使陳葺繕具德  
美愚人不敢當公不聽又辭曰抑短羽齊九皋之響殊不  
驚人使弊足追萬里之跡豈宜及遠雖沖霄有路且力小  
未任況逐日無功而敢煩羈勒公又不聽是以磨鉛赴鐸  
俎之割策鈍當天衢之駟流汗如沃愧顏若丹輒盡野辭  
書於琬琰銘曰

香山之東雪山之北善勝道場迦維之國飯王聖子有大  
威德菩薩伏膺龍天仰則總彼十名高談四諦能拔一毛  
普現一切阿僧祇劫瞬目所睇微塵剎土凝心所計無說

非默有說非語汲引未終豈厭寒暑八正齊列三乘並舉  
惆悵逝多歲不我與舉足下足羣魔愁謗歸歟歸歟飭彼  
迷忘優曇忽折摩尼驟喪海會無言靈山多曠猗歟大雄  
情靈藩翰上下四維吾道一貫藏諸不理顯諸不亂託跡  
光周遺宗炳漢操之則存捨之即亡如來寶印付囑我唐  
必正墜典克續頽綱法雨一潤佛日重光真諦所歸域中  
之大無爲所及宇宙之外幽宗默識元機暗會千劫飛輪  
萬方永賴旣崇其化邠國欽承久積吉行發言相膺意馬  
早繫心猿不升出彼夢宅如上岡陵不捨有相無相所依

不離有作無作所歸焚舟得濟到岸應稀達人是是塵人  
非非雲赴壽山澤歸福海層峰永固波瀾不改衆善斯立  
舒光耀彩樹彼勝因憑茲爽塏順生攝生從俗出俗因機  
立化賢愚共欲精廬大敞材力豐足購地

闕一字

金開堦累

玉大匠誨人必先規矩大巧垂美亦先棟宇墨請操繩般  
求執斧撲斲未已師者如堵千仞之桂良工所度十圍之  
松備於制作細飾土木海物交錯藻井舒蓮含芳吐萼裝  
嚴寶藏水陸窮珍瓊姿競麗華樸爭新馳光耀谷浮彩榮  
瀕旣美且良悉得其眞寶樹成行寶堦上聳善安不拔善

高不恐欄楯曲周簷楹抱擁蓋若天垂花如地涌實以方  
外四門不局虛以圓內萬法有經金石絲竹風來可聽玉  
釜旃檀日照彌馨鏡開八面燈傳一光夜浮素魄晝助紅  
芒齊明隱顯等鑒行藏膏平潤久心直燃長忍鎧常穿四  
魔不脅智劍常拔三災不怯何以奉佛剎那散業何以奉  
國演日成劫

劉重約

重約大中時中大夫奚官局令宣歙池等州監軍使

再修敬亭府君廟宇記

夫山川邱陵能出雲爲風雨見怪物皆曰神故先王之制祭也法施於民則祀之以勞定國則祀之能禦大災則祀之能捍大患則祀之莫不咸享今之府君在宣宛牧伯所封之內保護國人實謂昭晰若歲大旱年穀不登虔奉祈雩罔不克聖觀民悅敬如日之暘宣歙池等州監軍使中大夫奚官局令上柱國賜緋魚袋劉重約自大中七年癸酉歲六月朔受命監撫抵郡涉旬祇肅祀事皆賴其祐報謝之禮煥乎廟室命工人塑馬二所飾神八人整砌繪壁丹雘樂楹事逾周星尤蒙影響無何去秋瘥瘵背發其瘍

日益疲羸浹辰不間遂扶危登樓遙享奠酬神之克念翌  
日乃瘳蓋府君之威力也復以秋七月戊申朔十七日甲  
子謹遣押衙兼監察御史錢儉楊貫等虔誠啟祀以求吉  
祥咸獲休徵至九月丁未朔二日戊申躬自報賽大具牢  
醴鼓吹節奏絃匏笙簧俯伏廟墀再覩儀像泣然流涕禮  
及三爵油油而退又以受用塗金銀杯盤二事獻於座右  
復捨鏡二面周環各一尺五寸裝飾寶帳以覆府君之首  
兼出俸金米物等資助工糧計緡百千旣美所羞益彰幽  
贊於戲天地之道能陰能陽神祇之道有柔有剛故知天

則不言而信神則不怒而威福善禍淫式穀與汝矣重約  
今監戎向滿赴闕是期聊紀幽微刻於貞石永爲不朽大  
中十年四月一日建

李順融

順融僖宗朝內樞密使

成都得寶磚古篆賀表

今者爰有維城來於仙觀至誠纔發嘉兆俄呈現此時在  
地之赤光是昔日度關之紫氣及穿積土果獲古文驗逸  
勢於龍蛇知即平於梟獍來於冲邃理頗昭明旣太上今

與平災知中和永昌厥祚所現全因聖祖掘得又自皇枝  
捧此靈蹤可明天意且混元聖祖每逢多難皆有殊祥唯  
彼明徵備書正史昔於丹鳳門上告田同秀以天寶復國  
之期今又青羊肆中示李特立以陛下還宮之慶莫不天  
下幸甚乞付史館

楊復光

復光閩人本喬氏少養於內常侍楊元价家爲小黃門監  
乾符中賊渠黃巢犯江西復光爲排陣使招討使宋威戰  
敗復光總其兵王鐸代爲招討使詔復光監忠武軍中和



元年充天下兵馬都監總諸軍入定關輔定議遣使以墨  
詔召李克用於太原收京師以功加開府儀同三司同華  
制置使封宏農郡公賜號資忠輝武匡國平難功臣卒年  
四十二贈觀軍容使諡曰忠肅

收復京城奏捷露布

頃者妖興霧市盜嘯叢祠而岳牧藩侯備盜不謹謂大同  
之運常可容奸謂無事之秋縱其長惡賊首黃巢因得充  
盈窟穴蔓延荏蒲驅我蒸黎徇其兇逆展鋤鶴以成鋒及  
殺耕牛以恣燔炮魑魅晝行虺蜴夜噬自南海失守湖外

喪師養虎災深馴梟逆大物無不害惡靡不爲豺狼貽朝  
市之憂瘡痍及腹心之痛遂至毒流萬姓盜汚兩京衣冠  
銜塗炭之悲郡邑起邱墟之嘆萬方共怒十道齊攻仗九  
廟之威靈殄積年之兇醜河中節度使王重榮神資壯烈  
天賦機謀誓立功名志安家國至於屯田待敵率士當衝  
收百姓十餘萬家降賊黨三萬餘衆法能持重功遂晚成  
久稽原野之刑未決雷霆之怒自收同華進逼京師夕烽  
高照於國門遊騎頻臨於灞岸旣知四隅斷絕百計奔衝  
如窮鳥觸籠似飛蛾赴焰雁門節度使李克用神傳將畧

天賦忠貞機謀與武藝皆優臣節共本心相稱殺賊無非  
手刃入陣率以身先可謂雄才得名飛將統領本軍南下  
與臣同力前驅雖在寢興不忘寇孽今月八日遣牙隊將  
前鋒楊守宗河中騎將白志遷橫野軍使滿存躡雲都將  
丁行存朝邑鎮將康思貞忠武黃頭軍使龐從等三十二  
都隨李克用自光泰門先入京師力摧兇逆又遣河中將  
劉讓王瓌冀君武孫珙忠武大將喬從遇鄭滑將韓從威  
荆南大將申屠悰滄州大將賈滔易定大將張仲慶壽州  
大將張行方天德大將顧彥明左神策弩手甄君楚公孫

勝左橫衝軍使楊守亮躡雲都將高周彝忠順都將胡貞絳州監軍毛宣伯聶宏裕等七十都繼進賊尚爲堅陣來抗官軍李克用率勵驍雄整齊金革叫譟而聲將動瓦暗咽而氣欲吞沙寬列戈矛密張羅網於是麾軍背擊分騎橫衝日明而劍曜飛輪風急而旗開走電使賊如浪便可塞流使賊如山亦須折角蹂踐則橫屍入地奔騰則積血成川楊守宗等齊驅直入合勢夾攻從卯至申羣兇大潰自望春宮前蹙殺至昇陽殿下攻圍戈不濫揮矢無虛發其賊一時奔遁南入商山徒延漏刃之生佇作飲頭之器

伏自收平京闕三面皆立大功若破敵摧兇雁門實居其首其餘將佐同效驅馳兼臣所部二萬餘人數歲櫛風沐雨旣茲平盪並錄以聞

宋光葆

光葆光嗣從弟以宦者事蜀先主王建爲給事黃門官宣徽北院使累遷東川節度使嘗請誅唐使李嚴後主王衍不從國亡後居閬州後唐明宗時爲團練使安重誨所殺

上蜀主表

晉王攻滅朱梁紹唐稱制冒李氏之苗裔以鄭王爲遠祖

遣使西來侮慢尤甚輕蔑我國必將交惡宜勵兵選將執  
戈待寇請於秦州屯兵萬人鳳州三千人控扼要害命大  
將帥兵萬人戍武威城應援秦鳳萬人戍興元應援金州  
及駱谷萬人屯利州應援文州及安遠城二千戍扶州爲  
秦鳳犄角命渠果州管下蠻酋各聚兵裹糧專聽師期昔  
成汭據山陵養兵五萬皆仰給雲安請擇安州刺史充峽  
路招討副使改榷鹽法以廣財用嘉眉二州增治戰艦募  
舟師五千下峽出江陵步騎出襄陽大兵急攻秦雍東據  
河潼北以厚利啗湖廣利則進師退則分據峽口及散關

以固吾國可以伐敵之心